

Evening Dogri News Bulletin,

13 April. 2025. 18:15 Hrs

Headlines

- राष्ट्रपति द्रौपदी मुर्मू, उपराष्ट्रपति जगदीप धनखड़ ते प्रधानमंत्री नरेंद्र मोदी होरें जलियांवाला बाग दे शहीदें गी अज्ज श्रद्धांजलि भेंट कीती।
- लेफ्टिनेंट गवर्नर मनोज सिन्हा होरें आखेआ ऐ जे दुश्मन आसेआ पैदा कीते जा'रदे खतरें खलाफ असेंगी मता सौगा सतर्क रौहना लोडचदा ऐ।
- मुख् सचिव अटल डुल्लू होरें जम्मू-कश्मीर च समाजी सुरक्षा आहली योजनाएं दी पुज्ज ते प्रभाव दी समीक्षा कीती।
- बसोए दा ध्यार अज्ज पूरे जम्मू संभाग च धार्मिक श्रद्धा ते जोशो-खरोश कन्नै मनाया जा'रदा ऐ, लेफ्टिनेंट गवर्नर मनोज सिन्हा ते मुख्मंत्री उमर अब्दुल्ला होरें लोकें गी बसोए दे ध्यार दियां ममारखां दित्तियां ना।

<><><><><><>

Prez. UP PM Jallianwala Bagh

राष्ट्रपति द्रौपदी मुर्मू, उपराष्ट्रपति जगदीप धनखड़ ते प्रधानमंत्री नरेंद्र मोदी होरें अज्ज जलियांवाला बाग दे शहीदें गी श्रद्धांजलि भेंट कीती ऐ। इक सोशल मीडिया पोस्ट च राष्ट्रपति मुर्मू होरें आखेआ जे 1919 च इस दिन शहीदें आसेआ दित्ते गेदे बलिदान गी म्हेशां चेत्ता कीता जाग कीजे उनें मुल्खे दी आजादी दी लड़ाई च अदम्य साहस दस्सेआ हा। उपराष्ट्रपति होरें आखेआ जे जलियांवाला बाग च साहडे शहीदें दा बलिदान स्वतंत्रता संग्राम च इक महत्वपूर्ण ध्याय ऐ। इसै चाल्ली प्रधानमंत्री मोदी होरें गी आखेआ जे जलियांवाला बाग हत्याकांड स्हाडे मुल्खे दे इतिहास दा इक काला ध्याय ऐ। उनें आखेआ जे औने आहली पीढ़ियां साहडे शहीदें दे इस बलिदान गी

म्हेशां चेत्ता रक्खंगना। इस दिन 1919 च ज्हारां बद्दे निर्दोश लोकें गी जलियांवाला बाग च ब्रिटिश अधिकारी जनरल डायर होरें गोलियां मारियै हत्या करी दिती ही।

<><><><><><>

LG-Rajouri Visit

उपराज्यपाल मनोज सिन्हा होरें अज्ज राजौरी दिवस दे मौके पर राजौरी जिले दा दौरा लाया ते 1947-49 च पाकिस्तान कबायलियें थमां राजौरी गी आजाद कराने च अपनी जिंदू दा बलिदान देने आहले शहीदें गी श्रद्धांजलि अर्पित कीती ते उन्दे परोआर आहलें गी सम्मानित बी कीता। उपराज्यपाल होरें ए.एल.जी राजौरी च आयोजित राजौरी दिवस समारोह च हिस्सा लैता ते इस मौके पर बोलदे होई उनें गलाया जे दुश्मन साहडे देसै गी कमजोर करने आस्तै उप्परोतली कोशशें च लगगे दा ऐ, पर अस्स डटियै ओहदा मकाबला करा'रदे आं ते असेंगी लोड ऐ जे असें मते चौकन्नै रेइयै दुश्मनें ते भैडे मंसूबें गी नाकाम बनाचै। उपराज्यपाल मनोज सिन्हा होरें आखेआ।

.....

ध्यानजोग ऐ जे जम्मू-कश्मीर दा 26 अक्तूबर 1947 च औपचारिक तौर पर भारत कन्नै विलय होआ ऐ, पर इसी दिक्खी नेई सखांदे होई पाकिस्तानी फौज ते कबालियें जम्मू-कश्मीर च हमला करी दिता ते राजौरी ते पुंछ जिले पर कब्जा करी लैता जिसी आजाद कराने च उत्थूं दे मकामी लोकें ते फौजियें अपनी जिंदू दा बलिदान देइयै अज्ज दे ध्याडे कोई 6एं म्हीने मगरा राजौरी गी आजाद कराया जेदे उपलक्ष्य च हर बरे 13 अप्रैल गी राजौरी दिवस मनाया जंदा ऐ। इस मौके पर अज्ज बक्ख-बक्ख स्कूले थमां विद्यार्थियें रंगारंग सांस्कृतिक कार्यक्रम बी पेश कीते। आकाशवाणी समाचार कन्नै गल्ल करदे होई विद्यार्थियें ते राजौरी थमां किश बुजुर्गे गलाया।

<><><><><><>

SC-Social Welfare

मुख्व सचिव अटल डुल्लू होरें अज्ज समाज कल्याण मैहकमे दी बैठक सदियै चलाई जा'रदी बक्ख-बक्ख कल्याणकारी योजनाएं दी लाभार्थियें तगर पुज्ज ते एहदी असरदार अमलावरी बारै समीक्षा कीती। बैठक दौरान मुख्व सचिव होरें इस्सलै चला'रदी बक्ख-बक्ख पैहलकदमियें बारै व्यापक जायजा लैता जिंदा मकसद बाल

कल्याण, खुराक ते समाज दे होरनें तबकें दी भलाई बेहतरी यकीनी बनाना हा। इन्दे चा विशेष रूपै नै दिव्यांग लोक, विधवां, बुजुर्ग ते आरक्षित वर्ग शामिल ऐ। मुख सचिव होरें इस मौके पर सुरक्षा ते समाज दे दबोए-लतडोए दे वर्गे दी भलाई-बेहतरी, सुरक्षा ते समाजी न्याऽ यकीनी बनाने लेई कनूनी ढांचे बारै बी व्यापक जानकारी हासल कीती।

<><><><><><>

CS-RIDF Meet

मुख सचिव अटल डुल्लू होरें मते अखतेयारें आली कमेटी दी बैठक लाइयै ग्रामीण ढांचागत विकास फंड दी परियोजनाएं जिनें गी नाबार्ड आस्सेआ हत्थे च लैते गेदा ऐ, दे कम्में दी प्रगति दा जायजा लैता। एहू कम्म जम्मू कश्मीर दे बक्ख-बक्ख सेक्टरें च चलाए जा'रदे न। मुख सचिव होरें कम्में गी समें सिर पूरा करने पर जोरपाया ते परियोजनाएं दे मुकम्मल होने बारे प्रमाणपत्र जमा करोआने लेई बी आखेआ तां जे परियोजनाएं लेई फंड मुहैआ होई सकन।

<><><><><><>

Army-Recovery

किश्तवाड़ जिले दे जांगली इलाके छात्तरू च जारी आतंकरोधी अभियान दौरान टाकरे आहली थाहरै थमां सुरक्षाबलें, हथियार गोला-बरूद ते बिस्फोटक समेयान बरामद कीता ऐ जेदे च 1 ए.के रफल, 1 एम-4 रफल, 40 रौंद ते वायरलेस सेट शामिल न। 9 अप्रैल थमां शुरू होए दे इस टाकरे च सुरक्षाबलें अज्ज तोड़ी 3 आतंकवादियें गी मारी मकाये दा ऐ। तोआई, जंदे रोज चिरे राती इलाके थमां दपक्खी गोलीबारी दी बी खबर ऐ ते मन्नेआ जा'रदा ऐ, इलाके च अजे बी किश आतंकवादियें छप्पे दे होई सकदे न।

<><><><><><>

ते हुन बाकि दिएं खबरें कन्नै विजय बजाज।

Jammu Baisakhi

जम्मू-कश्मीर ते उत्तर भारत दे होरनें हिस्सें च बी अज्ज बसोए दा ध्यार पूरे जोश ते भाईचारे दे कन्नै मनाया जा' रदा ऐ। बसोए दे ध्यार दा, सिक्ख समुदाय दे लोकें लेई खास महत्व ऐ कीजे सिक्खें दे 10में गुरू, श्री गुरू गोबिंद सिंह जी होरें अज्जै दे ध्याड़े सन् 16 सौ 99 च खालसा पंथ दी स्थापना कीती ही। लेफ्टिनेंट गवर्नर मनोज सिन्हा ते मुखमन्त्री ओमर अब्दुल्ला होरें इस पवित्तर मौके उप्पर लोकें गी ममारखां दित्तिआं ना। जम्मू नगर निगम आसेआ जम्मू स्मार्ट सिटी ते सैलसफा निदेशालय दे सैह्योग कन्नै नमें विकसित कीते गेदे सूर्यपुत्री तवी रीवरफ्रंट पर अज्ज बसोए दा ध्यार मनाया जा'रदा ऐ। इस कार्यक्रम तैहत रिवायती कुश्ती मुकाबला ते सूर्यपुत्री तवी घाट पर बशेश आरती दा आयोजन बी शामिल ऐ।



Udh. Baisakhi Mela

उधमपुर जिले च पवित्तर देविका नदी दे कंडे पर अज्ज त्रै ध्याड़ें दा ऐतिहासिक देविका बसाखी मेला शुरू होआ। उधमपुर दिएं डिप्टी कमिशनर सलोनी राय होरें डी.डी.सी अध्यक्ष लाल चंद, उधमपुर वेस्ट थमां विधायक पवन कुमार गुप्ता ते जिले दे होरनें अधिकारिएं दी मौजूदगी च इस मेले दा औपचारिक तौरा पर उद्घाटन कीता। आम लोकें गी महत्वपूर्ण जानकारियां उपलब्ध करवाने दे मकसद कन्नै बक्ख-बक्ख मैहकमें आसेआ मेले च स्टाल लाए गेदे ना। इस मौके पर देविका नदी दे आले-दोआले रूख-बूहटे लाने दा अभियान बी चलाया गेआ। इस सरबंध्यै च मीडिया गी जानकारी दिंदे होई उधमपुर दियां डिप्टी कमिशनर सलोनी राय ते मेले च आई दी इक्क विद्यार्थी नै अपने विचार सांझे कीते।



Poonch-Baisakhi

जम्मू-कश्मीर दे होरनें हिस्सें आहला लेखा बन्ने आहले जिले पुंच्छ च बी अज्ज बसोए दा ध्यार बड़ी धूम-धाम कन्नै मनाया गेआ। इस मौके पर खरी मती गिनतरी च लोकें संतपुरा डेरा नंगाली साहब जाइयै मत्था टेकेआ। महंत मंजीत सिंह होरें लोकें गी खालसा पंथ दी 326मीं बरे गंड दियां ममारखां दित्तियां। आकाशवाणी समाचार कन्नै इस बारै गल्लबात करदे होई जिला गुरूद्वारा प्रबंधक कमेटी दे प्रधान नरेंद्र सिंह होरें आखेआ।

तोआई, रियासी ते साम्बा जिलें च बी बसोए दा ध्यार धार्मिक श्रद्धा ते जोश कन्नै मनाया गेआ। 30 ज्हार शा मते श्रद्धालुएं रियासी जिले च स्थित ऐतिहासिक डेरा बाबा बंदा बहादुर हुंदी थाहर पर जाइयै उत्थे मत्था टेकेआ। सांसद जुगल किशोर शर्मा होरें बी उत्थे मत्था टेकेआ ते मगरा मीडिया कन्नै गल्लबात करदे होई उनें आखेआ।

<><><><><><>

Weekly Theatre Init

जम्मू-कश्मीर च रंगमंच यानि थियेटर दी परम्परा च नमें सिरेआ जान भरियै इसी बढावा देने दी दिशा च इक्क महत्वपूर्ण गैह पुट्टे होई जम्मू-कश्मीर दी कला, संस्कृति ते भाषाएं सरबंधी अकैडमी आसेआ अभिनव थियेटर च हफ्तावार रंगमंच पहलकदमी दी शुरूआत कीती गई ऐ। अकैडमी दियें सचिव हरविंद्र कौर हुंदी दिक्ख-रिक्ख हेठ एह पहलकदमी शुरू कीती गई ऐ जेदा मकसद प्रदेश च रंगमंच आहली परम्परा गी नियमित तौरा पर नाटक खेड्डियै मकामी समुदाय च अपनेपन आहली भावना गी बदाइयै इसी होर मजबूत करना ऐ। साप्ताहिक रंगधारा दा पैहला गेड जम्मू च शुरू होआ ऐ ते एहदा दुआ गेड मई म्हीने कश्मीर च शुरू होग।

<><><><><><>

Padama Nominations

अगले ब'रे दे पद्म पुरस्कारें लेई इस ब'रे 31 जुलाई तगर नामांकन कीते जाई सकडन। नामांकन दी प्रक्रिया जंदी 15 मार्च थमां शुरू होई गेदी ऐ। पद्म पुरस्कारें लेई नामांकन ते सफारशां छडियां राश्ट्री पुरस्कार पोर्टल पर गै स्वीकार कीतीआं जाडन। चुने गेदे पद्म पुरस्कार विजेताएं दे नांऽ अगले ब'रे गणतंत्र दिवस पर घोषित कीते जाडन।

<><><><><><>